

# QUESTIO MEDICA 48

Cardinalitiis disputationibus manè discutienda in  
Scholis Medicorum die Jovis 3. Martij.

M. EDMUNDO CHARRIER, Doctore  
Medico Præside.

*An salubriora ex Plantis alimenta, quàm ex Animalibus?*

## I.

**R**EMOTIORA humani corporis elementa, vulgata sunt quatuor: Proxima, humor; in quem connatum calor agens, indigestam molem disgregat, eamque in partes similes, & organicas, è quibus totum consurgit corpus distribuit. Hic porro calor numquam otiosus, partes jam effictas humore semper affluente auget, & firmat; dumque agit in humorem, hunc pro re natâ versat, & immutat; crudum coquit, coctum segregat, secretum assimilât: Nec solummodo conformationem, accretionem, & nutritionem perficit, sed omnes quæ in nobis fiunt actiones caloris beneficio absolvuntur: Illius moderatione vivimus, excessu ægotamus, defectu morimur. Sic vita calore conservatur, calor verò fovetur sanguine, & sanguis alimentorum succo instauratur. Quale igitur alimentum, talis est sanguis; qualis sanguis, talis calor; qualis calor, talis actio, ac constitutio redditur. Laudabilis sanguis ex optimis cibariis nascitur, qui si temperatus, blandum calorem sanitatis parentem servabit; si biliosus, intensiorem; unde acuti plerumque morbi oriuntur: si pituitosus, remissiorem, unde vulgò chronici: si paucus, debiliorem, qualis in valetudinariisprehenditur; si nimius, languidiorem; ob impeditam spirituum distillationem, unde apoplexiæ, tetani, interitusque contingunt repentini. Summa itaque sanitatis tuendæ ratio, in cibis scire eligendis, & ritè assumendis sita est, qui eò salubriores censendi, quò temperatiores, coctu faciliores, & ad nutriendum aptiores habentur.

## II.

**H**I quidem cibi non ab omni re promiscuè petuntur, sed ab his duntaxat quæ vitâ fruuntur; ut ex Animalibus & Plan-

tis, è quibus solis medicamenta quoque educuntur. Ex alimentorum albo metalla, lapides, & mineralia expunguntur, ut pote quæ corpus suâ substantiâ non nutrant, nec ipsi suâ qualitate medeantur. Hinc aurum potabile ad curandam valetudinem tantùm putabile: Uniones atque lapilli è quibus pretiosæ parantur confectiones, cum nihil nutrimenti habeant, nihilque medicaminis, potius idola fatuorum, quàm commenta Medicorum audiunt. Quædam mineralia, noxios licet aliquando humores dejiciant horrendo vomitu, idcirco inter medicamina saltem interna propriè haberi non debent: Ea si quidem præstent quod venena exiguâ quantitate exhibita efficere solent. Ex Animalibus alimentum, & medicamentum; sed naturæ nostræ minùs conveniens quàm quod ex Plantis deducitur. Creophagia namque propria est luporum aut vulturum, quorum vorax est calor, non autem hominis cui *lignum fructiferum & herbam seminalem dedit in escam* qui solus omnia fecit, & novit. Alimentum calori nostro accommodatum unicuique parti alendæ respondere debet: Temperatum, euchymum, & eupeptum cuius prodest; frigidum tamen calidis naturis salubrius est, ut calidum frigidis; sic gracilibus copiosum convenit, tenue obesis, & quodlibet fit sanum sanis. Polytrophum cum euchymo sæpè ratio confundit, & dyscratum à temperato vulgò discernere nequit; quò fit ut vera cibi eligendi lex, non tam sit ratio, quàm instinctus etiam in homine cæcus, qui pro fermentationum ratione quod necessarium est appetit, nisi pravâ consuetudine, aut saporis suavitatem corrumpatur.

### III.

**P**Plantas ad usum Medicum, & culinarium; Bruta verò ad vestitum, & ad alia vitæ commoda natura providè largitur hominibus. Plus voluptatis quàm necessitatis stimulo urgentur, qui ad epulas carnes animalium vocant: Hæ quippè plus saginant, quàm corporis habitum conservent. Plantæ habitui nostro convenientiores, corpus vegetum sustentant; illudque ab optimâ constitutione desciscens, unâ aut alterâ, quâ præpollent qualitate, ad mediocritatem revocant. Quid tibi optandum vitæ prorogandæ causâ, quod in plantis non reperias? Esuris? Ecce tibi tot panis, quot frugum, aut leguminum species numerantur. Panem fastidis? salivam fortè movebunt innumera radicum, caulium, olerum, herbarumque feroula. Nauseam tibi movent? Recreabit te ingens fructuum omnigenorum varietas. Stomachum

gravant? sunt fraga, Idæi rubi mora, mala armeniaca, & alia id genus stomacho innoxia. Non quovis reperiuntur tempore? Ecce tibi altera planta cujus succo, nempe saccharo fugaces fructus condiuntur; cæteri quâlibet tempestate offeruntur cuilibet tempestatî, naturæ, & ætati opportuni. Nonne fraga vere, æstate cerasa, autumno poma, & hyeme nuces, amygdalæ, & molles castaneæ inveniuntur? Jam sitiste urget? Ecce tibi ex vite vita, aut ex racemis vinum, convivii deliciæ, spirituum fomes, juventutis hilaritas, lac senectutis. An abstemius? Sunt alia ex aliis fructibus vina, sicera ex pomis, & quot fructuum, toridem vini species, Ex granis zitum, cælia, cervisia; Ex baccis sorberum; & ex radicibus ptisana. Itane tam exquisita deducuntur ex animantibus esculenta? An panis vitæ fundamentum, lautior parabitur ex toto, aut parte animalis, quàm ex zeâ, tritico, aut fœcali? An potio ex sanguine aut humore quovis educetur suaviôr, quàm ex uvis Burgundiâcis, aut Rhemenfisibus? An cupedia plura? an jucundiora? an inventu, cultu, aut paratu faciliora quàm ex Plantis quæ usquaque germinant & virescunt.

## I V.

**C**IBI ex Animalibus desumpti, vel ab iis integris, ut ab Costreis, alburnis, cochleis; vel ab eorum partibus, putâ carne, sanguine, adipe; vel ab eorum excrementis videlicet lacte, & melle, petuntur. Quæ integra devorantur non famem, sed ventrem implent. Caro vitiosum generat sanguinem aut nimis copiosum; Aliæ si quæ sint partes gulæ gratæ, stomacho erunt noxiæ. Sanguis enim hunc ipsum gravat, adeps huic nauseam parit; cæteræ non coquuntur. Lac, extractum quoddam est plantarum potius quàm animalium, quæ quidem in ore animalis conteruntur, in ventre macerantur, & per papillam in liquorem album stillantur; quare cum nundum lac facerit in animalis substantiam, eò salubrius est, quò magis plantæ naturam redoler. Mel quoque videtur florum magisterium ab apibus elaboratum, multos habens usus, quos non tam ab animaliculo quàm à plantarum flore obtinet. Juscula carniû qui præscribunt in acutis, diætâ tenuem non observantes, plus naturæ reficiendæ, quàm morbo expugnando student. Qui sâni carnes edunt, sanitati non consulunt, etenim animalis vitia, & mores imbibunt, dum illius carne vescuntur. Alites quæ ferinam sapiunt non comedit canis, ne vim odorandi inde amittat. Rapax ales carnivororum quadrupedum carnem vicissim refugit, nè morbum exinde con-

4

trahat. Solus homo rationis consiliique particeps, in victu ratione, consilioque non utitur, non instinctui, sed voluptati credens, se cibo ingurgitat, animumque unâ cum corpore opplet variâ obsoniorum saburrâ.

V.

**H**IC licet quocumque cibo vivat, & valeat; hoc tamen illo-  
ve multò salubrius, aut insalubrius nutritur. Qui petitur ex  
plantis, minùs quidem, quàm qui ex animalibus, sed salubrius  
implet. Vitæ protrahendæ cibus utique necessarius est; verùm  
nunquam illius paucitate, sæpius exuperantiâ obruimur. Visita-  
que longam, felicemque degere vitam, frugi esto, nec sarcopha-  
gus. Rara quippe in esu carniùm frugalitas; rarior in crapulâ sa-  
nitas. Quorum corpus in saginâ est, vulgò spiritus in macie. Po-  
lyphagia, & polyposia consuetudinis res est, non naturæ, cui ni-  
miùm omne inimicum est. Multis elephantis una sylva, quidni  
uni homini alendo culta mundi plaga non sufficeret? quin quadru-  
pedibus, piscibus, volatilibus utatur ad alimoniam. Gregi boum  
pascua præbet unicùm pratum; cur hominis ventri latranti non  
facient satis dona Cereris, Pomonæ, Floræ, patrisque Liberi. So-  
lus panis pro alimento esse potest, non sola caro, quæ animi pa-  
thematum, potius quàm corporis partium alimentum est. Creo-  
phagia semper noxia, vel enim vitium quoddam partibus inurit  
pravâ qualitate, vel plethoram substantiâ polytrophâ ingenerat,  
ac proinde morborum iliadem accersit. Hinc carnivori vulgò  
polyfarci, obesi, lenti, anhelii, stupidi, & somnolenti; Athleta-  
rum more citò intereunt, nisi maturè succurratur. Cynos Cor-  
siciæ incolas *μακροβίους* existimaverunt veteres quod herbis tantum  
vescerentur. Vitæ suæ pensum diu prorogarunt radicibus Ere-  
micolæ. Quin & Rusticani qui frequentius herbas quàm carnes  
edunt, Urbanis vivaciores sunt. Primi sæculi homines fructi-  
bus, & frugibus contenti, ad mille annos vitam egerunt incolu-  
mes, nempe cum moderatiori, temperatiorique uterentur cibo;  
non indiguerunt operâ Medici, qui largâ cruoris missione super-  
fluum detraheret, ventrisque infarctus ingrâtâ catharsis elimina-  
ret.

*Ergo salubriora ex Plantis alimenta quàm ex Animalibus.*

Afferebat Parisiis CLAUDIUS HUGOT, Cabilo-  
nensis, Baccalaureus Medicus. A. R. S. H. 1678.

PARISIIS, Apud Franciscum Muguet, Regis & Illustrissimi Archiepiscopi Parisiensis Typographum.